

Fiskalak 23 lagun akusatu ditu Filesaren auzian

MADRIL

Marino Barbero epaileak Filesaren auzian inplikaturako 39 lagunetarik 23 besterik ez ditu akusatu Antonio Salinas fiskalak. Fiskalaren akusazioetatik kanpo geratu diren artean daude Emilio Ibarra BBVko lehendakaria eta Jose Angel Sanchez Asiain banku horretako lehendakariordea.

Filesa eta bere inguruko enpresetako arduradunak daude fiskalak akusaturakoen artean: Josep Maria Sala PSOEko senadorea, Carlos Navarro diputatu ohia, Alberto Flores eta Luis Olivero. Beren aurkako salaketa izango dute ere PSOEren finantza arduradun izandako Guillermo Galeote diputatu ohia eta Aida Alvarez.

Ustez PSOE alferrikako txostenen bidez finantzatu zuten bankarien artean daude Alfonso Escamez BCHko lehendakari ohia eta Jose Antonio Saenz de Azkunaga BBVko zuzendaritzakoa, eta ez, ordea, Ibarra eta Sanchez Asiain.

Auzi hau lau urtez ikertu ondoren, joan den abuztuaren hasieran afera eta epaila utzi zuen Marino Barbero epaileak, Juan Carlos Rodriguez Ibarra Extremadurako lehendakariak egin zizkion kritika gogor batzuen aurrean nahiko babes jaso ez zuelakoan. Auzi utzi aurretik, maiatzean, guztira 39 lagun inkulpatu zituen PSOEren finantzaketa ez-kutuan.

Irailaz geroztik auzia Enrique Bacigalupo epaileak darama, baina oraindik Barberok utzi zizkion 19.000 orrialdeak aztertzen ari da. Instrukzioa aurki amaituko da.

Produkzioa % 30 gutxitzearen truke Seati dirulaguntza ematea onartuko du Bruselak

Enpresaren eta sindikatuen iritziz, lortutako aurreakordioa pozgarria da

Europako Batzordea prest dago Espainiako Estatuak Seat autogintza enpresari eman nahi dion 46.000 milioi pezetako dirulaguntza onartzeko, baldin eta 1993. urtearekin alderatuta produkzioa % 30 gutxitzen badu. Enpresako zuzendariak eta langileek begi onez jaso dute Bruselaren erabakia.

BRUSELA

Karel Van Miert Kompetentziarako Europako komisarioak atzo jakinarazi zuenez, «aldeko jarrera» izateko eskatuko dio Europako Batzordeari Seati eman beharreko dirulaguntza publikoak eztabaidatzen dituean. Aholku horren ondoren, ia guztiz baztertu behar da Seati eman beharreko laguntzak debekatzea, baina azken erabakia hil honen amaieran jakingo da.

«Uste dugu Seatek 1993ko produkzioa % 30 gutxitzen badu nahikoa izango dela Estatuaren laguntzak jasotzeko», esan zuen Van Miert holandarrak, Juan Manuel Egiagarai Industria ministro espainiarrarekin batera emandako prentsaurrekoan. Egiagarai azaldu zuenez, Europako Batzordeko ordezkariak Zona Francako eta Martorellgo lantegiak bisitatu ditu eta inpresio ona jaso du. Zona Francako lantegi zaharra itxi egingo da, eta bere lekuan hornitze poligono bat eraikiko da. Produkzio guztia Martorellgo lantegi modernoak egingo du, gaurko erritmoan gutxi gora-behera.

**ENPRESARIAK
ETA SINDIKATUAK
POZIK** Seateko zuzendari-
tzako bo-
zeramaile batek esan zuen erabaki hori espero zutela eta produkzioa % 30 gutxitzea ez dela inolako problemarik izango,



Kinnock, Egiagarai eta Van Miert aurreakordioaren berri ematen.

EFE

«1993an 800.000 auto egin bakenituen, iaz 313.000 eta aurten 360.000 inguru. Produkzio murrizketa honek langileengan ez duela eraginik izango ziurtatu zuen bozeramaileak.

CCOOko ordezkari batek ere esan zuen ziur zirela dirulaguntzak onartuko zituztela, baina aurreakordioaren berri zehatza jakin arte ez dutela sakonki komentatu gehitu zuen. CCOOko sindikalistak azpimarratu zuen ez dutela inolaz ere beste lanpostu murrizketarik onartuko, eta gogorarazi zuen 1993az geroztik Seaten 6.000 lanpostu galdu direla, gehientsuenak jubilazio aurreratuen edo kaleratze sarituen bidez. Gaur egun, autogintza enpresak 12.560 behargin ditu. Produkzio murrizketa dagoeneko betetzen ari direla gehitu zuen CCOOko ordezkariak. UGTko ordezkari bat ere zuhur azaldu zen, baina berri pozgarria dela esan zuen.

Iberiari buruzko erabakirik ez

BRUSELA

■ Europako Batzordeak hil honen amaieran erabakiko du Espainiako Gobernuak Iberiari eman nahi dion 130.000 milioi pezetako dirulaguntza onartzen duen ala ez. Espainiako aire konpainiari ezinbestekoa zaio dirulaguntza hori, egoera ekonomiko larrian baitago eta bere beregiritatze planak dirutza hori aurrikusten duelako konpainiak aurrera egin dezan. Nolanahi ere, Iberiak beste kapital handitze publiko bat jaso zuen 1991. urtean, eta aire konpainiek debekatuta dute bi laguntza jasotzea.

Juan Manuel Egiagarai Industria ministroak atzo iragarri zuenez, elkarriketak bide onetik

doaz eta uste dute Europako Batzordeak erabakia hila amaitu aurretik plazaratuko duela. Egiagarai ministroak gezurtatu egin zuen urtarilean aurkeztutako bideragarritasun planari aldatetarik egin dizkiola baimena ziurtatzeko.

Karel Van Miert Kompetentziarako komisarioa ez da 130.000 milioi pezetako laguntza baimentzearen oso aldekoa, Neil Kinnock Garraio komisario britainiarrak, aldiz, jarrera irekiagoa du. Zenbait iturriren arabera, Brusela prest legoke 52.000 milioi pezetako laguntza onartzeko, «gizarte laguntzak ordaintzeko eta 1993an Espainiak bizi izan zuen krisi ekonomikoa dela medio».

Martxoan hauteskunderik ez badago, zentsura mozioa aurkeztuko du CiUk

BARTZELONA

Felipe Gonzalezek Espainiako Legebiltzarrerako hauteskundeak datorren martxorako iragartzen ez baditu, CiUk zentsura mozioa aurkeztuko duela jakinarazi zuen atzo Jordi Pujol Generalitateko lehendakariak. Gonzalezek ez zuen mehatxutzat hartu adierazpen hau, eta bere hitza beteko duela erantzun zion Pujoli.

«PSOEek zerbait saiatzen badu bere lehendakariak hitzartutakoa

ez betetzeko, hau da, hauteskundeak martxoan izango direla, CiUk zentsura mozio baten alde egiteko edo aurkezteko eskubidea izango luke», ziurtatu zuen Pujolek. Zentsura mozio horren helburu bakarra hauteskundeak egitea izango litzatekeela nabarmendu zuen Pujolek. Bere iritziz, hobe litzateke hauteskundeak otsailean izatea martxoan beharrean, gaur egungo egoera politikoa «oso hauskorra» delako. Generalitateko lehendakariak gezurtatu egin zuen Gonzale-

lezekin pakturen bat egin duela, berak Kataluniako azaroko hauteskundearen ondoren PSCren laguntza beharko balu, ondoren legegintzaldi espainiarra luzatzeko. «Ez dago pakturik, eta ez dugu negoziatu ere egin nahi», esan zuen Pujolek.

Gonzalezek berehala erantzun zion Pujoli, zentsura mozioa «gorde» zezakeela erantzunez. «Esandakoa beteko dut eta iragarritako egutegia jarriko dut martxan», esan zuen Gonzalezek Kongresuan.



IDIAZABALGO UDALA

IRAGARKIA

Idiazabalgo Udalak, 1995eko irailaren 26an egindako Batzaraldian, besteak beste, ondorengo erabakiak hartu zituen, zeintzuk herri ekipamenduaren area bat (Pilarrenea) eta dentsitate txikiko egoitzazko bi areak (Zelaa eta Goatse) sortzeko Idiazabalgo Hirigintza Antolamendurako Arau Subsidiarioen 4 zenb. Elementu Aldaketak eragindako lur sailai dagozkien:

- Desjarraipeneko ekintza-banako Mugaketaren hasierako onarpena.
- Borondatezko Birzatatiketa egitasmoaren hasierako onarpena.

Bi espedienteak jendaurrean erakutsirik jartzen dira hamabost laneguneko epean.

Idiazabal, 1995eko urriak 3. ALKATEAK